



**Grad Sarajevo**  
**City of Sarajevo**

Bosna i Hercegovina  
Federacija Bosne i Hercegovine  
Kanton Sarajevo  
Grad Sarajevo  
**GRADSKO VIJEĆE**

**Odluka**  
**o utvrđivanju posebnog značaja za Grad Sarajevo**  
**za Udruženje turističkih vodiča Sarajeva „Vučko“**  
**(Prijedlog)**

**Predlagač:** Gradonačelnica  
**Obrađivač:** Gradska služba za lokalno poslovanje

**Sarajevo, januar 2024. godine**

**Adresa:** Hamdije Kreševljakovića 3  
71000 Sarajevo, BiH  
**Tel:** +387 33 216 659  
**Fax:** +387 33 205 874  
**Email:** gsgv@sarajevo.ba  
**Web:** gradskovijece.sarajevo.ba



Na osnovu člana 31. stav (1) tačka b). Statuta Grada Sarajeva („Službene novine Kantona Sarajevo“, broj 7/23), kao i na osnovu člana 8. stav (1) Odluke o načinu sticanja statusa udruženja i fondacija od posebnog značaja za Grad Sarajevo („Službene novine Kantona Sarajevo“, broj 51/21), Gradsko vijeće Grada Sarajeva, na \_\_. sjednici održanoj dana \_\_. \_\_. 2024. godine, donijelo je:

**(Prijedlog)**

**Odluku  
o utvrđivanju posebnog značaja za Grad Sarajevo  
za Udruženje turističkih vodiča Sarajeva „Vučko“**

**Član 1.**

Ovom Odlukom utvrđuje se da je Udruženje turističkih vodiča Sarajeva „Vučko“ od posebnog značaja za Grad Sarajevo, kao organizacija čiji je jedan od ciljeva edukacija i trening članova Udruženja u cilju bolje prezentacije Sarajeva kao turističke destinacije te na taj način doprinosi afirmaciji grada Sarajeva, a što predstavlja vrijednosti od posebnog značaja za Grad Sarajevo.

**Član 2.**

Djelatnosti Udruženje turističkih vodiča Sarajeva „Vučko“ finansirat će se iz sredstava Budžeta Grada Sarajeva, iznosom od 4.000,00 KM (slovima: četirihiljade KM), kroz više budžetskih godina, odnosno dok Udruženje ispunjava opće i posebne uslove za sticanje statusa posebnog značaja za Grad Sarajevo, odnosno do prestanka statusa, u skladu sa Odlukom o načinu sticanja statusa udruženja i fondacija od posebnog značaja za Grad Sarajevo.

**Član 3.**

Nadzor nad provedbom Odluke vrši gradonačelnica Grada Sarajeva putem nadležne Službe.

**Član 4.**

Izmjene i dopune Odluke vrše se na način i po postupku za njeno donošenje.

**Član 5.**

Odluka stupa na snagu narednog dana od dana objavljivanja u „Službenim novinama Kantona Sarajevo“.

**PREDSJEDAVAJUĆI GRADSKOG VIJEĆA**

**Jasmin Ademović**

**Broj:**  
**Sarajevo, \_\_. \_\_. 2024. godine**

## OBRAZLOŽENJE

### PRAVNI OSNOV

Pravni osnov za donošenje Odluke sadržan je u članu 31. stav (1) tačka b) Statuta Grada Sarajeva kojim je propisano da Gradsko vijeće donosi odluke, druge propise i opće akte i daje njihovo tumačenje, kao i u članu 8. stav (1) Odluke o načinu sticanja statusa udruženja i fondacija od posebnog značaja za Grad Sarajevo, čijom odredbom je, između ostaloga, utvrđeno da Gradsko vijeće Grada Sarajeva donosi konačnu odluku o utvrđivanju posebnog značaja za određeno udruženje ili fondaciju, na prijedlog gradonačelnice Grada Sarajeva.

### RAZLOZI DONOŠENJA

Udruženje turističkih vodiča Sarajeva „Vučko“, sa sjedištem u Sarajevu, obratilo se gradonačelnici Grada Sarajeva Zahtjevom za sticanje statusa udruženja od posebnog značaja za Grad Sarajevo. Uz zahtjev su dostavljeni dokazi o ispunjavanju općih i posebnih uslova definisanih Odlukom o načinu sticanja statusa udruženja i fondacija od posebnog značaja za Grad Sarajevo.

Udruženje turističkih vodiča Sarajeva „Vučko“ osnovano je 2018. godine. Primarni cilj Udruženja bio je okupiti sve turističke vodiče Sarajeva u jednu organizaciju, te u skladu s tim udruženje danas okuplja 52 člana.

U svom utvrđenom djelovanju, Udruženje turističkih vodiča Sarajeva „Vučko“ ima za misiju olakšati svim vodičima put do postajanja istinskih profesionalaca u svojoj oblasti, dok je vizija Udruženja da svaki turistički vodič postane istinski ambasador, te putem standardizacije, edukacije, stručnim izlaganjem i prezentacijom na najbolji mogući način predstavi grad Sarajevo i Bosnu i Hercegovinu stranim gostima, kao i prijateljima grada Sarajeva.

Gradonačelnica je, u skladu sa odredbama Odluke o uslovima i načinu sticanja statusa udruženja i fondacija od posebnog značaja za Grad Sarajevo, uputila Gradskom vijeću Grada Sarajeva prijedlog da se za Udruženje turističkih vodiča Sarajeva „Vučko“ utvrdi status od posebnog značaja za Grad Sarajevo.

Cijeneći naprijed navedeno, kao i Mišljenje Gradske službe za lokalno poslovanje, broj 07-02-6716-1/23 od 02.11.2023. godine i Člana. 8 stav (1) Odluke o uslovima i načinu sticanja statusa udruženja i fondacija od posebnog značaja za Grad Sarajevo te imajući u vidu činjenicu da turistički vodiči imaju značajnu ulogu u cjelokupnoj ponudi turističke destinacije, kao i uzimajući u obzir da navedeno udruženje svojim djelovanjem i definiranim ciljevima doprinosi produženju boravka posjetilaca u našem gradu i inspirira ih da se ponovno vrate, što predstavlja vrijednosti od posebnog interesa i značaja za Grad Sarajevo, Gradsko vijeće Grada Sarajeva donijelo je ovu odluku.

### FINANSIJSKA SREDSTVA

Finansijska sredstva za realizaciju ove odluke obezbjeđuju se u Budžetu Grada Sarajeva.